



საგანმანათლებლო პროგრამების აკრედიტაციის
საბჭოს გადაწყვეტილება
ქ. თბილისი



MES 4 22 0000045169



20/01/2022

ა(ა)იპ - ჯიპა - საქართველოს საზოგადოებრივ საქმეთა ინსტიტუტის "პოლიტიკის მეცნიერებებ
ის" საბაკალავრო საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1 „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „საგანმანათლებლო დაწესებულებების საგანმანათლებლო პროგრამების აკრედიტაციის დებულების“ (შემდგომში - აკრედიტაციის დებულების) 27² მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამისთვის

აკრედიტაციის მინიჭების შესახებ, თუ “უმაღლესი განათლების შესახებ“ საქართველოს კანონის 66-ე მუხლის 3¹ პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის 3¹ პუნქტისა და აკრედიტაციის დებულების 27⁶ მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „შესაბამისობაშია სტანდარტის მოთხოვნებთან“.

1.3. „აკრედიტაციის დებულების“ 27⁵-ე მუხლის მე-3 პუნქტის შესაბამისად, აკრედიტაციის მინიჭების შესახებ გადაწყვეტილების მიღების შემთხვევაში, საბჭო უფლებამოსილია აკრედიტაციის მაძიებელს მისცეს რეკომენდაციები.

1.4. „აკრედიტაციის დებულების“ 27⁶-ე მუხლის პირველი პუნქტის „ბ“ ქვეპუნქტის თანახმად, ერთ სტანდარტთან მიმართებით მაინც შეფასდა, როგორც „მეტწილად შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „ნაწილობრივ შესაბამისობაშია სტანდარტის მოთხოვნებთან“ ან „არ არის შესაბამისობაში სტანდარტის მოთხოვნებთან“, საბჭო იღებს გადაწყვეტილებას აკრედიტაციის შესახებ და დაწესებულებას განუსაზღვრავს ვადას მიღებული რეკომენდაციების შესრულების თაობაზე ანგარიშის წარსადგენად, რაც აისახება საბჭოს სხდომის ოქმში.

1.5. „აკრედიტაციის დებულების“ 27⁵-ე მუხლის მე-7¹ პუნქტის თანახმად საგანმანათლებლო პროგრამის აკრედიტაციის უწყვეტობის მიზნით, საგანმანათლებლო პროგრამის ყოველი მომდევნო აკრედიტაციისას ამ მუხლის პირველი პუნქტის „ა“ და „ბ“ ქვეპუნქტებით გათვალისწინებულ გადაწყვეტილებაში მიეთითება აკრედიტაციის ვადის დასაწყისი (გადაწყვეტილების ამოქმედების თარიღი), რომელიც, საგანმანათლებლო დაწესებულების შუამდგომლობის საფუძველზე, შესაძლებელია განისაზღვროს გადაწყვეტილების ძალაში შესვლის დღიდან დარჩენილ მიმდინარე აკრედიტაციის ვადის დასრულების მომდევნო დღიდან ან გადაწყვეტილების ძალაში შესვლის დღიდან დარჩენილ მიმდინარე აკრედიტაციის დასრულებამდე არსებული კონრეტული თარიღიდან.

2. აღწერილობითი ნაწილი და დასაბუთება

2.1. 2021 წლის 13 აგვისტოს ა(ა)იპ - ჯიპა საქართველოს საზოგადოებრივ საქმეთა ინსტიტუტმა სსიპ - განათლების ხარისხის განვითარების ეროვნულ ცენტრში (შემდგომში - ცენტრი) წარმოადგინა №791556 სააკრედიტაციო განაცხადი "პოლიტიკის მეცნიერებების" საბაკალავრო საგანმანათლებლო პროგრამაზე.

2.2. ცენტრის დირექტორის 2021 წლის 3 სექტემბრის №853567 ბრძანების საფუძველზე, ა(ა)იპ - ჯიპა საქართველოს საზოგადოებრივ საქმეთა ინსტიტუტი ცნობილ იქნა აკრედიტაციის მაძიებლად. ცენტრის დირექტორის 2021 წლის 13 ოქტომბრის № 1086902 ბრძანებით შეიქმნა ექსპერტთა ჯგუფი, რომელმაც 2021 წლის 28 და 29 ოქტომბერს განახორციელა სააკრედიტაციო ვიზიტი ა(ა)იპ - ჯიპა საქართველოს საზოგადოებრივ საქმეთა ინსტიტუტში, ხოლო 2021 წლის 17 დეკემბერს წარმოადგინა აკრედიტაციის ექსპერტთა დასკვნა, რომლის შესაბამისად, სააკრედიტაციოდ წარმოდგენილი პროგრამა შეფასდა შემდეგნაირად:

სტანდარტები	შესაბამისობაშია მოთხოვნებთან	მეტწილად შესაბამისობაშია მოთხოვნებთან	ნაწილობრივ შესაბამისობაშია მოთხოვნებთან	არ არის შესაბამისობაში მოთხოვნებთან
1. საგანმანათლებლო პროგრამის მიზანი, სწავლის შედეგები	√			

და მათთან პროგრამის შესაბამისობა				
2.სწავლების მეთოდოლოგია და ორგანიზება, პროგრამის ათვისების შეფასების ადეკვატურობა		√		
3.სტუდენტთა მიღწევები, მათთან ინდივიდუალური იმუშაობა	√			
4.სწავლების რესურსებით უზრუნველყოფა	√			
5.სწავლების ხარისხის განვითარების შესაძლებლობები	√			

2.3. საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია.

2.4. ზეპირი მოსმენა გაიმართა 2021 წლის 29 დეკემბერს. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიციის, ასევე სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ ნაწილობრივ გაიზიარა ექსპერტთა დასკვნაში ასახული შეფასება, კერძოდ 2.3 ქვეკომპონენტში დაემატა რეკომენდაციები, თუმცა არ შეცვლილა მე-2 სტანდარტის შეფასება და ის „მეტწილად შესაბამისობაშია მოთხოვნებთან“, 4.4 ქვეკომპონენტის რეკომენდაცია გადავიდა რჩევებში, შედეგად ეს კომპონენტი შეფასდა როგორც „შესაბამისობაშია მოთხოვნებთან“, 5.1 ქვეკომპონენტში დაემატა რეკომენდაცია, თუმცა არ შეცვლილა მე-5 სტანდარტის შეფასება და ის „შესაბამისობაშია მოთხოვნებთან“.

3. სარეზოლუციო ნაწილი

„უმალესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 პუნქტის, მე-3¹ პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 პუნქტის, 3¹ პუნქტის, აკრედიტაციის დებულების 27² მუხლის პირველი პუნქტის, 27⁵ მუხლის პირველი პუნქტის „ა“ ქვეპუნქტის და მე-5 პუნქტის, 27⁶ მუხლის პირველი პუნქტის „ბ“ ქვეპუნქტის, 33-ე მუხლის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011

წლის 01 ივნისის N223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად, აკრედიტაციის საბჭომ, კენჭისყრის შედეგად, 12 ხმით არცერთის წინააღმდეგ

გადაწყვიტა:

1. დაკმაყოფილდეს ა(ა)იპ - ჯიპა საქართველოს საზოგადოებრივ საქმეთა ინსტიტუტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ „პოლიტიკის მეცნიერებების“ საბაკალავრო საგანმანათლებლო პროგრამას 7 წლის ვადით მიენიჭოს აკრედიტაცია, 1 წლის თავზე რეკომენდაციების შესრულების თაობაზე ანგარიშის წარმოდგენით.
2. ცნობილ იქნას აკრედიტაციის ექსპერტთა ჯგუფის დასკვნა „პოლიტიკის მეცნიერებების“ საბაკალავრო საგანმანათლებლო პროგრამის შესახებ ამ გადაწყვეტილების განუყოფელ ნაწილად (დანართი №2).
3. ცნობილ იქნას საბჭოს 2022 წლის 20 იანვრის № 44727 სხდომის ოქმის №5 ნაწილი ამ გადაწყვეტილების განუყოფელ ნაწილად (დანართი №3).
4. საბოლოოდ, აკრედიტაციის საბჭოს მიერ დაწესებულებას განესაზღვრა შემდეგი რეკომენდაციები და რჩევები:

რეკომენდაციები:

- 4.1 რეკომენდებულია, სასწავლო კურსების „საქართველოს სახელმწიფო მოწყობა და პოლიტიკური სისტემა“, „არასახელმწიფო აქტორები პოლიტიკაში“ წინაპირობად განისაზღვროს სასწავლო კურსი „შესავალი პოლიტიკურ მეცნიერებებში“;
- 4.2 რეკომენდებულია, პროგრამას დაემატოს „პოლიტიკის თეორიის“, „პოლიტიკური იდეოლოგიების“ საკითხები;
- 4.3 რეკომენდებულია, პროგრამის ყველა სილაბუსში დაკონკრეტდეს და დაზუსტდეს საკონტაქტო და დამოუკიდებელი საათები, სასწავლო კვირების რაოდენობა, ფინალური გამოცდებისთვის გამოყოფილი საათები. აღნიშნული ჩანაწერები უნდა იყოს მკაფიო, გასაგები და დათვლადი;
- 4.4 რეკომენდებულია, პროგრამის ყველა სილაბუსის სასწავლო კურსების შედეგების გადახედვა/რეფორმულირება სასწავლო კურსების შედეგების გაზომვადობითვის;
- 4.5 რეკომენდებულია, განხორციელდეს შინაარსობრივი ცვლილებები სასწავლო კურსებში „საქართველოს სახელმწიფო მოწყობა და პოლიტიკური სისტემა“, „შედარებითი პოლიტიკა“;
- 4.6 რეკომენდებულია, სასწავლო კურსები „პოლიტიკის თეორია“ „პოლიტიკური ფილოსოფია/პოლიტიკური აზრის ისტორია“, „შესავალი პოლიტიკის მეცნიერებებში“, „პოლიტიკური იდეოლოგიები“, „პოლიტიკური სოციოლოგია და ანთროპოლოგია“ განხილულ იქნას როგორც სფეროს მაკვალიფიცირებელი სასწავლო კურსების ერთობლიობა და არსებული სასწავლო კურსების შინაარსების განახლებისა და ახალი სასწავლო კურსების შექმნის პროცესში უზრუნველყოფილ იქნას აღნიშნული კურსების შინაარსობრივი გამოიჯვნა და ერთმანეთთან ბმა (წინაპირობად განსაზღვრა, სემესტრული გადანაწილება);
- 4.7 რეკომენდირებულია გადაიხედოს და დაზუსტდეს სასწავლო კურსის „ პოლიტიკური მარკეტინგის სტრატეგიები“ წინაპირობა კურსის შინაარსის გათვალისწინებით;
- 4.8 რეკომენდებულია, გადაიხედოს და ჩასწორდეს ინგლისური ენის სწავლების შეთავაზების ლოგიკური ჩარჩო და თანმიმდევრობა როგორც დონეების მიხედვით, საკონტაქტო საათების რაოდენობით, ისე სემესტრულ გადანაწილებასთან მიმართებით სწავლის შედეგების მიღწევის კუთხით;
- 4.9 რეკომენდირებულია, უნივერსიტეტმა სტუდენტთა შეფასებისას არ გაითვალისწინოს სემინარზე დასწრების კომპონენტი;
- 4.10 რეკომენდებულია ამოქმედდეს შიდა ხარისხის მონიტორინგის მექანიზმები პროგრამის მდგრადი განვითარების უზრუნველსაყოფად.

რჩევები:

- სასურველია, დასკვნითი სასწავლო პროექტების პრაქტიკაში განხორციელების შემდეგ, უსდ-მ განაახლოს სწავლის შედეგების რუკის დასკვნითი სასწავლო პროექტის შედეგებთან შესაბამისობა;
- სასურველია გაფარდოდეს შრომის ბაზრის კვლევის არეალი;
- სასურველია, პროგრამის სტრუქტურა (სავალდებულო/არჩევითი/თავისუფალი არჩევითი კომპონენტების შეჯამებული კრედიტები) უფრო ნათლად იყოს წარმოდგენილი პროგრამის აღწერილობით ნაწილსა და თვითშეფასების დოკუმენტში;
- სასურველია, ინგლისური ენის შემსწავლელი სასწავლო კურსების (დონეების მიხედვით) შეთავაზების ლოგიკა და პოლიტიკა ნათლად ჩანდეს პროგრამის აღწერილობით ნაწილში;
- სასურველია, პროგრამის სტრუქტურაში განხორციელდეს ცვლილებები სავალდებულო ნაწილის მოცულობის შესამცირებლად და არჩევითი/თავისუფალი არჩევითი კურსების კრედიტების გასაზრდელად პროგრამის მიზნებისა და შედეგების ურღვევობის გათვალისწინებით;
- სასურველია, გადაიხედოს უნიფიცირებული კრედიტები არჩევით სასწავლო კურსებთან მიმართებით;
- სასურველია ეკონომიკური ბლოკის სასწავლო კურსებში (ეკონომიკის შესავალი, საჯარო სექტორის ეკონომიკა და ბიუჯეტირების საკითხები) გადაიხედოს სავალდებულო ლიტერატურა/გადაფარვები;
- სასურველია, განხორციელდეს ცვლილებები სასწავლო კურსების „პოლიტიკური ფსიქოლოგია“, „შესავალი ეროვნულ უსაფრთხოებაში“, „ევროკავშირის პოლიტიკა“ სავალდებულო და დამხმარე ლიტერატურის ნაწილში;
- სასურველია, გაიზარდოს აკადემიური წერის კრედიტების მოცულობა 5 ან 6 კრედიტამდე;
- სასურველია, აკადემიური წერის სილაბუსის შინაარსი ითვალისწინებდეს დასკვნითი სასწავლო პროექტის კვლევის დიზაინს;
- სასურველია, სილაბუსის შინაარსში დაემატოს კვლევის რაოდენობით მეთოდებთან დაკავშირებული მასალა;
- სასურველია, დასკვნითი სასწავლო პროექტის სტრუქტურის ნაწილის მოთხოვნებში ჩანაწერის სახით აღინიშნოს საკვლევი საკითხის თეორიასთან მიმართების აუცილებლობა;
- სასურველია, აკადემიური პერსონალის დატვირთვის სქემაში აისახოს ინფორმაცია დაგეგმილი კვლევით-სამეცნიერო ღონისძიებებში ჩართულობის შესახებ;
- სასურველია ფინანსური მდგრადობის დასადგენად პროგრამის ბიუჯეტში გათვალისწინებული სტუდენტთა მინიმალური საჭირო რაოდენობა (Break-even) გამოთვლილი იქნას პროგრამის აქტიური სტატუსით სტუდენტთა რაოდენობიდან გამომდინარე. პროგრამის ფინანსური მდგრადობა უზრუნველყოფილია 72 სტუდენტის შემთხვევაში, თუმცა, პოლიტიკის მეცნიერების საბაკალავრო პროგრამის აქტიური სტატუსი მქონე სტუდენტთა რაოდენობა შეადგენს 43-ს;
- ები პროგრამის განვითარებისთვის: · სასურველია, აკადემიური და მოწვეული პერსონალისათვის ტრენინგების ორგანიზება სილაბუსების ფორმირებასა და აუცილებელ ელემენტებთან მიმართებაში.

5. რეკომენდაციების შესრულების თაობაზე ანგარიშის წარმოდგენის ვადად განისაზღვროს 1 წელი (2022 წლის 29 დეკემბრამდე);


6. საბჭოს აღნიშნული გადაწყვეტილება ძალაში შევიდეს 2021 წლის 29 დეკემბერს.

7. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ.თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი N64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) ცენტრის ვებ-გვერდზე (www.eqe.ge) გამოქვეყნების დღიდან, ერთი თვის ვადაში.

საგანმანათლებლო პროგრამების აკრედიტაციის
საბჭო
თავმჯდომარე
ზედგინიძე-ჯიშკარიანი ნათია



საგანმანათლებლო პროგრამების აკრედიტაციის
საბჭო
საბჭოს მდივანი
შენგელია მარიამ



№	ინფორმაცია საგანმანათლებლო პროგრამის შესახებ	
1	საგანმანათლებლო პროგრამის დასახელება	პოლიტიკის მეცნიერებები
2	ერთობლივი უმაღლესი საგანმანათლებლო პროგრამა	-
3	სტატუსი	აკრედიტებული
4	სტატუსის გათვალისწინებით, საბჭო(ებ)ს გადაწყვეტილების თარიღი და ნომერი	N18, 26.01. 2018
5	ხელახალი აკრედიტაციის შემთხვევაში საგანმანათლებლო პროგრამის წინა დასახელება	პოლიტიკის მეცნიერებები
6	უმაღლესი განათლების საფეხური	ბაკალავრიატი
7	დაშვების წინაპირობები	-
8	კვალიფიკაციის დონე	მეექვსე
9	კვალიფიკაციის დასახელება	პოლიტიკის მეცნიერების ბაკალავრი
10	ზოგადი განათლების შესაბამისი საფეხურის საგნის/საგნების/საგნობრივი ჯგუფის სწავლების უფლების მითითებით	-
11	დეტალური სფეროს დასახელება და კოდი (ISCED – F – 2013)	0312 - პოლიტიკის მეცნიერებები და მოქალაქეობრიობის საფუძვლები
12	სწავლების ენა	ქართული
13	ECTS კრედიტების ჯამური რაოდენობა	240
14	განხორციელების ადგილი	გორგასლის 101ა, ქ. თბილისი, 0114, საქართველო
15	მსჯავრდებულ აბიტურიენტთა საგანმანათლებლო პროგრამაზე სწავლა - სწავლების უფლებამოსილება	-
16	ამ გადაწყვეტილების ძალაში შესვლის თარიღი	2021 წლის 29 დეკემბერი
17	აკრედიტაციის საბჭოს მიერ გაცემული რეკომენდაციების შესრულების თაობაზე ანგარიშის წარმოსადგენად/მონიტორინგის განსახორციელებლად განსაზღვრული ვადა	1 წელი, 2022 წლის 29 დეკემბრამდე.
18	აკრედიტაციის ვადის გასვლის თარიღი	2028 წლის 29 დეკემბერი